

RTR e Docmine cun l'emprim videobook rumantsch

■ (rtr) A partir d'immediat è il videobook, realisà en connex cun il mais tematic «Ils Svizzers», era disponibil per rumantsch. Mariano Tschuor, directur RTR Radiotevisiun Svizra Rumantscha, e Patrick Müller, manader da fatschenta da la firma da produzioni Docmine, han preschentà quel il glindesdi en il rom da la discussiun al podium «Medias e lur rolla per l'identitad d'ina cuminanza linguistica». Il videobook «Die Schweizer» ch'è vegnì realisà en tuttas quatter linguas naziunals pon ins telechargiar dal App Store sin il tablet. El preschenta l'istorgia svizra en ina nova dimensiun e pussibilescha a l'utilisader da far sin ses tablet in viadi tras il passà.

Sequenzas da video or da la seria «Ils Svizzers» da la SRG ssR èn vegnidas complettadas cun texts supplementars, cun cartas interactivas e galarias da maletgs cun funtaunas originalas. Ils purtrets dals pioniers da la Veglia Confederaziun e da la Svizra moderna èn uschia liads en in vast context istoric e pussibileschan al public da sa fatschentar en moda differenziada cun nosssa istorgia.

«Fatsgs istorics n'interesschan betg sulettamain mai, mabain ina gronda part da la populaziun. Quai avain nus era constatà il november passà cura che la SRG ssR ha realisà il mais tematic 'Ils Svizzers'.»

Era RTR ha realisà en il radio, en la televisiun ed en l'internet emissiums e



Patrick Müller e Mariano Tschuor preschentan l'emprim videobook rumantsch.

MAD

contribuziuns davart il svilup da la Svizra. Ed ussa cumpara il videobook era per rumantsch. Era quai è «service public!», di Mariano Tschuor, directur RTR, ch'è medemamain stà responsabel per l'entir project «Ils Svizzers» da la SRG ssR. «Nus avain plaschier che RTR è, sco nus, persuadi da la forza innovativa dals videobooks. Uschia è l'istorgia svizra accessibla en moda e maniera chapibla, en spezial er ad in public pli giuven, en nosssa quarta lingua naziunala», manegia Patrick Müller da la firma da produzioni Docmine.

Sin Youtube pon ins guardar in curt videoclip che resumescha l'idea fundamentala dal videobook:
www.youtube.com/watch?v=U_poPJBQyTQ